

**Sanaartornermi neqerooruteqartitsisarneq pillugu Inatsisartut inatsisaata  
allannguutissaatut siunnersuut**  
*(Ineqarnermut, Attaveqarnermut Angallannermullu Naalakkersuisumit saqqummiunneqartoq)*

**pillugu**

**Attaveqarnermut Ineqarnermullu Ataatsimiititaliap**

**ISUMALIUTISSIISSUTAA**

**Siunnersuutip aappassaaneerreqarnerani saqqummiunneqartoq**

Ataatsimiititaliap suliarinninnerani ilaasortat uku najuupput:

Inatsisartunut ilaasortaq Justus Hansen, Demokraatit, siulittaasoq

Inatsisartunut ilaasortaq Olga P. Berthelsen, Inuit Ataqatigiit

Inatsisartunut ilaasortaq Debora Kleist, Inuit Ataqatigiit

Inatsisartunut ilaasortaq Anders Olsen, Siumut

Inatsisartunut ilaasortaq Malik Berthelsen, Siumut

Ulloq 1. marts 2011-mi upernaakkut 2011-mi ataatsimiinnermi siullermeerinnereermermi siunnersuut ataatsimiititaliap misissorpaa.

**Siunnersuutip imarisaa siunertaalu**

Sanaartornermi neqerooruteqartitsisarneq pillugu inatsimmi malittarisassat inatsillu taanna tunngavigalugu peqqussutit atuutilersinneqartut sakkortunerusumik atortinneqarnisaannik kissaateqarneq inatsimmi tunuliaqutaavoq. Julip qaammataani 2010-mi inatsisip atuutilersinneqarnerata kingorna ataasiakkaanik iluarsiiisoqartariaqarnera pisariaqartinneqartoq paasinarsivoq. Siullermik ”Kalaallit Nunaanni sanaartornermi suliaqarnermut pilersuinerimullu ataatsimoortumik piumasaqaatit” (AP) atorneqarnerat siunnersuummi erseqqissarneqarpoq.

Tullianik inatsisinik unioqqutitsilluni aalajangiinerit imaluunniit neqerooruteqartitsinermik sulianik inatsisinut naapertuuttunngortitsinerit atorunnaarsinnissaannut

Neqerooruteqartitsisarnermut Maalaaruteqartarfik pisinnaatinneqalissaaq. Aammattaaq Maalaaruteqartarfiup aalajangiisinnaatitaaffii imaalillugit pisariillisarneqarput, tassalu Neqerooruteqartitsisarnermut Maalaaruteqartarfiup siulittaasuata suliat allakkatigut tunngaviliilluni aalajangiiffigineqarsinnaasut, imaluunniit tunngaviusunut aalajangiisussaannigitsut aalajangiiffisinnaavai, kiisalu suliat ingerlanissaannut apeqqutit aalajangiiffigisinnaallugit.

### **Inatsisartut siunnersuummik siullermeerinninnerat**

Siunnersuut partiit akornanni annertuumik tapersorsorneqarpoq, sanaartornermi iluarsisassat pilersut ingerlaavartumik iluarsineqartarnissaat pissusissamisoortoq partiit isumaqarmata. Maannakkorpiaq pisortat sanaartugassaataannik aammalu sanaartugassanik pisortanit tapiiffigineqartunik neqerooruteqartitsinermi inuiaqatigiit aningaasaqarnerat eqqarsaatigalugu nukittorsaanissanik suliniuteqartoqarneranik taassumalu ataani ilaatigut aamma suliffiit ilinniartissat siuarsarniarlugit suliniutinik ingerlatsisoqarneranik saqqummiussisummi Naalakkersuisut taasaqarnerat partiit aammattaaq assut iluarisimaarpaat.

### **Ataatsimiititaliap siunnersuummik suliarinninera**

Siunnersuummik matuminnga ataatsimiititaliap suliarinninnissaanut atugassanik tusarniaanermi akissutit assilinerinik ataatsimiititaliap pissarsivoq. Inatsisartut Siulittaasoqarfiata ilusiliinissamut piumasaqaatitut aalajangersagai tunngavigalugit tusarniaanermi akissutit inatsisissatut siunnersuummut Inatsisartunut oqaluuserisassanngortitamut ilanngullugit tunniunneqartussaannerat ataatsimiititaliap eqqaasitsissutigissavaa.

### Apeqqutit

Apeqqutit arlallit ataatsimiititaliap siunnersuummik suliarinninnissaanut atugassat akissuteqarfigeqqullugit ataatsimiititaliap Naalakkersuisut qinnuigai. Ataatsimiititaliap apeqqutaasa Naalakkersuisullu akissutaasa assilineri isumaliutissiissummi uani **ilanngussaq 1**-tut ilanngunneqarput.

Neqerooruteqartitsisarnermut Maalaaruteqartarfiup ilaasortai qassinut qummut killilerlugit ilaneqarsinnaanerat inatsisissatut siunnersuummi taaneqarsimannginneranut pissutaasoq aamma Neqerooruteqartitsisarnermut Maalaaruteqartarfimmi ilaasortat amerlisinneranni katitigaanerat qanoq issanersoq pillugu apeqqutit akineqarnissaat ataatsimiititaliap ilaatigut kissaatigaa.

Tassunnga atatillugu Naalakkersuisut akissutaat ataatsimiititaliap tusaatissatut tiguaa, akissummi Naalakkersuisut imatut isumaqarmata, tassalu *”Naalakkersuisoqarfik isumaqarpoq, maalaaruteqartarfimmi siulittaasoq suliani ataasiakkaani maalaaruteqartarfimmi ilaasortat ilasariaqarnerinik qanorlu aalajangiisinnaatitaaffilerneqarnissaannik aalajangiinissamut nammineerluni*

*kiffaangissusilerneqartariaqartoq. Siulittaasoq maalaaruteqartarfimmi ilaasortat sulianik ilisimasallit isumasioqatigalugit taamatut aalajangiisassasoq eqqarsaatigineqarsinnaavoq”*

Aamma tassunga atatillugu ataatsimiititaliap malugaa Naalakkersuisut akissutaanni imatut allassimasoqarmat: *”Inatsisitigut tunngaviusup atornerlunneqarsinnaanera Naalakkersuisoqarfimmit ilimagineqanngilaq, tassalu maalaaruteqartarfiup aalajangersagaq killeqanngitsumik ilasarnissaminut atornerlunnavianngilaa.”*

Tusarniaanermi akissutit pillugit siunnersuummut nassuiaatini immikkoortoq 9-mi imatut allassimasoqarpoq: *”Tusarniaanermi § 27-imi imm. 2-mut nutaamut tunngatillugu oqaaseqaateqartoqarpoq, ”ilaasortat qassinngorlugit amerlineqarsinnaanersut immaqa iluaqutaasumik allanneqartariaqartoq [-sinnaasoq], taamatullu nassuiaatini Maalaaruteqartarfiup neqerooruteqartitsinernik suliaqarnerani siulittaasoqarfimmiit peqataatinneqartut ilaasortatut sulianik ilisimasalittut ilaasut amerlaqatigissagaat naatsorsuutigineqartoq allassimaneranut taarsiullugu immaqa inatsimmi toqqaannartumik allassimanissaa eqqarsaatersuutigineqarsinnaasoq”.*

Inatsisissatut siunnersuummut nassuiaatini tusarniaanermi akissummi taaneqarpoq: *”Naalakkersuisoqarfimmit tamanna tusaatissatut tiguneqarpoq nassuiaatillu allanngortinneqarlutik.”*

Tassunga atatillugu tusarniarneqartuni sorleq oqaaseqaammik saqqummiussisuunersoq taaneqarsimangitsoq ataatsimiititaliap malugaa. Tamanna tunngavigalugu ataatsimiititaliap inassutigissavaa tusarniaaffigisat oqaaseqaataat innersuussutigineqartillugit kina oqaaseqaateqartuunersoq Naalakkersuisut siunissami nalunaarutigisassagaat, pineqartumi uani tassaasoq INI A/S.

Ataatsimiititaliap aamma oqaatigissavaa INI A/S-ip oqaaseqaataa naalakkersuisoqarfiup tusaatissatut tigugaa oqaatigineqarmat tamanna tikkuusisutut ataatsimiititaliap isiginngimmagu, uanimi pineqarmat siunnersuummi immikkoortoq pineqartoq Naalakkersuisut peersimagaat. Taamaattumik tusarniaanermi akissutit Naalakkersuisunit qanoq isummerfigineqarsimanagerat paatsuugassaanngitsumik – eqqortumillu tikkuussisumik – oqaaseqaatini siunissami allassimasassasoq ataatsimiititaliap inassutigissavaa.

### **Siunnersuutip aningaasatigut allaffissornikkullu sunniutissai**

Tamatuma kingorna siunnersuut pisortanut, namminersortunut innuttaasunulluunniit aningaasatigut allaffissornikkulluunniit sunniuteqassanngitsoq Naalakkersuisut oqaatigimmassuk Ataatsimiititaliap malugaa.

### **Attaveqarnermut Ineqarnermullu Ataatsimiititaliap inassutai**

Inatsisissatut siunnersuut akuersissutigineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiissummilu taaneqartunut paasinnilluni siunnersuut ataatsimiitiliap aappassaaniigassanngortippaa.

Justus Hansen  
Siulittaasoq

Olga P. Berthelsen

Debora Kleist

Anders Olsen

Malik Berthelsen